

可齋雜藁

卷一

一

二

三

四

五

六

七

八

九

總校官庶吉士臣倉聖脉

校對官原任典簿臣郭祚熾

膳錄監生臣連彭年

欽定四庫全書

可齋雜藁卷六

宋 李曾伯 撰

啟

代蜀總通四川崔制置

望紫荷橐九重端寄於腹心依碧油幢一節幸聯於臂
指方涓日交龜之云始豈趨風貢鯉之可稽恭惟某官
商周渭巖嶺蜀雪日有碩德雅望士論之所同歸無智
名勇功君子可以大受出處淵乎似道富貴了不關心

久矣踐敷結于東注擁節梅花之外遠有光華含香錦
帳之中寢躋清切小駐平山之欄檻屹成萬里之金湯
峻召來歸席遽前於夜半聯班侍從位實亞於冬卿屬
上念井絡之區以公任藩垣之寄輟枚徐於禁內借重
西陲得韓范於軍中寬憂北顧然而繫雪山之輕重孰
若佩天下之安危趙清獻由茲而踐政塗文潞公亦入
而居宰路此衮衣繡裳所以趣覲而青簾畫舫行且朝
宗舊軌既同新麻可必某轡絲謾攬韉綫無長幸於十

乘未行之先知有萬間可托之所燕來鴻去會達尚及
於此時翼附鱗攀依嚮尤深於他日

代通興元丁帥

雙節觀風蜀部玷轡絲之選十連作牧漢闕專鎖鑰之
雄宮塗何異徑之分國事有同舟之幸不腆邑敝敢致
邦交恭惟某官蓋代英名昂霄偉志得天地正直之氣
為社稷中興而生四十圍溜雨霜皮凜持勁操九萬里
搏風雲翼蚤入壯懷不辭州縣之勞已有廊廟之器道

德流於璧水教條著於蘇臺接武郎闡多士出權衡之
當疏榮匠監百工稱技巧之精績用既彰東知益懋謂
畫江以東不足以究中流擊楫之志而分陝以西粗可
以成高屋建瓴之形及究觀灞上真人經營棧道之區
又自昔隆中宰相指麾斜谷之地邱墟之陸沉在望山
河之風景不殊播一韓之謠遂開大閭下三秦之檄已
動中原適罹小雅蓼莪之悲爰用春秋墨經之典一致
忠孝斯世重輕書殿陞華位望已登於紫橐政塗錫命

姓名行覆於金甌某久矣游邊晚而沂峽念刑獄之寄
已重而錢穀之問方殷幸竊富鄰密依廣廈緯不遑恤
誰其念嫠婦之憂樂俾有瘳庶或借良醫之惠

代通瀘南楊帥

修門筮官久瞻文昌八座之尊涪部祥刑幸托元帥十
連之重信蜚緣之厚矣豈際會之偶然恭惟某官學問
儒宗禮樂王佐岷峨之山幾千丈與雪俱清坡顙之文
二百年遺風再見不事州縣鴈鶩行之問即躋朝廷鵷

鷺序之聯槐省蓬萊屢更清要粉闥蘭錡洊著聲華遂
陳犴狴之箴爰直螭坳之史典舜五禮繼持橐於甘泉
位周六官方紬書於東觀上思命相如之檄以諭蜀公
乃抗諸葛之表以渡瀘孺傳登朝若水以同州推官而
去錦衣過里魏公以武康節度而還坐寬九重殿西之
憂抑使六詔雲南之服第虞銀信促正鼎司某自揣謏
材謬將臬寄甫抵司存之所決獄幾何偶膺王事而來
會計而已正懼中流之罔濟喜于外閫之方新詹彼帳

轅但切聽尚書之履芘之厦屋庶幾安使者之車

代通瀘南曹帥

詠太白上蜀之難誤將繡節誦孔明渡瀘之表幸托碧
幢雖九天趣駕之莫留而一日同舟之亦幸在禮有贄
不文何辭恭惟某官相國參之規摹陳思植之藻翰文
字五千卷胸中浩有於江河才名三十年學者指之為
山斗巍科角立要路鼓行金閨焜燿於聲華壁水周流
於道德訪沙洲之鸚鵡雪泛千艘聽雲安之杜鵑月分

別乘爰擬伊川之易傳廼持子產之刑書德星移駐於
遂州益隆臺節愛日均孚於涪部大啟轅門扇以羽而
蠻夷自服於孟降檄不草而父老皆諭於漢指西門之
鑰固矣東山之袞歸兮公之此行登仙上且爰立作相
某蚤為邊役晚効蜀遊問決獄之幾何曰會計而已矣
殊無拆線曷理亂絲君去我來眼喜謝公之壤在事繁
交冷心隨工部之舟歸有以教之抑又幸甚

代京西漕通四川桂制置

蜀道分弓夙仰詩書之帥漢庭出節猥膺禮樂之華瞻
屏翰之上游喜關河之相望屬新祇命敢後修辭恭惟
某官一德老成兩朝鴻碩青山三百疊鍾簪橐之名流
丹桂五枝芳極衣冠之盛事分九重之大顧護萬里之
風寒忠定之治似諸葛公人服神明之見清獻之名過
蕭太傅士知廉節之規况能持力量之堅凝運精神之
靜定雲山玉壘翕令自得於蠡舄湯池金城足制方張
之蛇豕我車旣捷公衮盍歸勛名了劍閣之銘事業看

沙堤之築某志雖徇國材愧承家十年佐幕之何功一
障乘邊之已老東西阡陌手披荆棘之蒙茸咫尺穹廬
身歷烟蕪之蒼莽正恐習俎豆而未能軍旅之學當干
戈而盍圖襁褓之功敢期獲獲之誤知乃俾駱駟之俶
駕甫承蘭錡遽直木天既付之轉輸斂散之權仍寄以
參佐蕃宣之任凜然一髮引以千鈞賴大閫之幸逢有
餘波之可及攬轡而馳江漢緬懷問俗之清芬踞鞍而
望褒斜願示足兵之良畫

代通四川桂制置

玉壘殿邦葺纛擁四封之重珠曹筮仕青衫玷三語之
微天開際遇之機地在按臨之下依棲樾蔭荏苒瓜期
不虞厥足之超趯敢布此心之附麗恭惟某官兩朝碩
望千載真儒典型大雅之遺音學問中庸之至性青山
三百疊挺人傑以地靈丹桂五枝芳詵源深而流遠早
際明昌之運亟登清要之途十里淮源甫膺分月一麾
狄障即委護風宣流黼袞之仁聲振厲繡衣之精采三

邊烟靜已寒朔幕之羶十乘星馳未暖渚宮之席屬時
宵旰遠顧岷峨營柳成薇將建碧油之旗鼓省蘭位棘
峻陞黃道之衣冠繼登枚徐侍從之班爰重周召方伯
之寄兩年秉鉞四塞維城敵聞裴度之威名人樂子儀
之寬厚比聆元日果錫贊書用陞真學士之班益聳小
朝廷之望清廟貌而定鐘簋佇洗甲兵詠几寫而歸袞
衣經躋鼎鉉某少不更事癡未了官祇堪玉川耘耔之
充詎知柴桑紙筆之好肯堂肯穫厥父若是勤勞為箕

為裘其子乃弗負荷不圖冒昧茲在趨承版籍憤然決
無河東三絕之譽條章惜若焉有斗南一人之稱不遠
蜀道萬里以敢前恃有冀州二天之在上假之歲月厚
若邱山自今鵲或許於枝依庶俾燕少安於巢戀詣大
府而受約束又當聽命於馳驅知厦屋之為幘幪尚冀
比身於凌震

代蜀總夔路王漕

擔簦作蜀雪之遊比嘗假道臺節接漢星之分散後修

盟母曰幾於費辭所謂未能免俗恭惟某官活民敏手
蓋代英材閎闊摩雲鳳閣三賢之華胄聲猷起日花溪
八詠之清風彩纓富貴之津迎刃事機之地早遊幕府
西南已識於相如旋擁藩符江漢共稱於申伯踐敬既
久眷倚益隆謂瞿滢一門之衝路吳蜀二長之會萬貨
盈虛之計既資於鞭笞三等能否之林仰賴於權衡暫
煩轡絲原隰之華果著水鏡金湯之詠惟流馬方殷於
斜谷俾杜鵑少聽於雲安留丞相於漢闕顯膺明陟用